

ստանալու: Իսկ այնօր պատրաստել էին ի պատիւ մեզ: Իսկ նրանց ծուկութեան եւ դանդաղկոտութեան պատճառը պետք էր որոնել բոլորովին այլ հակումների մէջ: Ես նրանց անշարժ դեմքերի վրայ կարդում էի այդ հակումները, թէ «ինչո՞ւ մարդ պետք է կարօտ լինէր ուտելու, միթէ ավելի լաւ չէ՞ր, որ նա ազատ լինէր այդ հոգսից, որ ավելի ժամանակ ունենար անձնատուր լինելու աղօթքների եւ աստուծոյ փառաբանութեանը: Եւ իրաւ, նրանք ուտում էին օրը մի անգամ միայն, այն եւս պահոց կերակուրներ, իսկ տօն օրերում ուտեաց կերակուրներ, բայց միս՝ երբեք: Մեզ յետոյ ասացին, որ սեղանատան մէջ մեր այնօր տեսածը ամբողջ միաբանութիւնը չէր: Նրանցից շատերը չէին եկել ճաշելու. ոմանք գալիս են սեղանատուն ճաշելու երկու օրը մի անգամ, ոմանք՝ երբեք օրը մի անգամ, ոմանք՝ շաբաթը մի անգամ, ոմանք ամենեւին չեն գալիս եւ իրանց բացակայ ճգնարաններում կերակրւում են միայն բոյսերով: Այդ հալող, մաշող ծոմապահութիւնն էր պատճառը, որ այդ թշուառ հասարակութեան մէջ ես չէի տեսնում ոչ մի առողջ մարդ. բոլորը հիւանդոտ, նիհար, ցամաքած, զուլաթափ էակներ էին: Նրանց մէջ չկար ոչ կաթոլիկ արեղայի հաստ փորը եւ ոչ նրա պարարտ երեսի անբնական կարմրութիւնը:

Սեղանատան մէջ ուրիշ ձայն չէր լսւում, բացի արեղաներից մէկի ընթերցանութեան ձայնը, որ վերելում, պատի վրայ շինոած վանդակապատի մէջ բարձրացած, նստել էր եւ, ճաշի բոլոր տեսողութեան ժամանակ, կարդում էր սուրբերի վարքից զանազան պատմութիւններ: Բոլորի ուշադրութիւնը դարձրած էր դէպի այն կողմը: Բայց ես չէի լսում, որովհետեւ գրաբար ընթերցանութիւնից ոչինչ չէի հասկանում: Իմ ուշադրութիւնը գրաւել էին սեղանի պղնձեայ անօթները: Դրանք միատեսակ եւ միաձեւ չէին. մէկը մեծ էր, մէկը փոքր էր, եւ բոլորի վրայ կային հայոց տառերով արձանագրութիւններ: Երեւում էր, որ ժամանակների ընթացքում այդ անօթները զանազան երկրներից ուխտաւորները բերել էին իրանց հետ եւ, իբրեւ յիշատակ, իրանց մեղքերի. թողութեան համար՝ ընծայել էին վանքին: Իւրաքանչիւրի վրայ քանդակած էին նոիրոդի, նրա ծնողաց, նրա որդիների անունները: Նրանցից մի քանիսը շատ գեղեցիկ էին եւ մի քանի դարերի հնութիւն ունէին:

— Այդ զանազան երկրների հին արհեստի արդիւնքը, — ասաց ինձ յետոյ Ասլանը, — կարող է մի լաւ թանգարանի զարդը լինել:

Բոլորի զգեստը միաձեւ էր եւ միագոյն եւ պատրաստոած էր միեւնոյն նիւթերից: Մի թել անգամ բամբակից կամ մետաքսից չկար նրանց հագուստների մէջ, ամբողջապէս կարոած էին մազէ կոշտ գործածքներից: Նրանց հագուստը, որպէս երեւում էր, ոչ այնքան մարմինը պահպանելու